

A partir dal mez d'avust puspè normalitat

La radunanza da delegads da Gastro Grischun

GION NUTEGN STGIER/FMR

■ La federaziun che reunescha ils ustiers grischuns è plain speranza en vista a la stagiu da la stad. Franz Sepp Caluori ha fatg ina bilantscha da ses tschintg onns sco president da Gastro Grischun. El è vegnì reelegi per in ulteriur bienni. Mintga dus onns envida Gastro Grischun ad ina radunanza da delegads da dus dis. Quella avess stuì avair lieu l'onn 2020. Fixà da far quella era durant il mais d'avrigl, dentant pervi da Covid-19 n'èsi betg stà pussaivel d'organisar l'occurrenza. Er l'october 2020 n'èsi lura betg stà pussaivel da realisar la radunanza da delegads. Ussa èsi reussì da far quella a partir da mesemna, e quai a Poschiavo. Da la partida èn stads 110 ustiers ed ustieras. Tuts èn vegnids testadas sin corona. Per Gastro Grischun bain ina premiera en sia istoria da 107 onns d'avair da far per delegads e delegadas in test da pandemia avant la radunanza. Il president Franz Sepp Caluori ha ditg: «Nus avain sapientivmain vulì realisar la radunanza da delegads per sustegnair noss ustiers ed ustieras e per mussar ad els ed ellas ch'i saja puspè pussaivel da s'inscuntrar.» La regenza grischuna è stada preschenta a la radunanza generala da Gastro Grischun entras cuseglier guvernativ Peter Peyer.

Adina sin il current

Per Gastro Grischun è l'onn 2020, segnà da corona, stà in onn cun grondas sfidas. Permanentamain èn Franz Sepp Caluori e Marc Tischhauser, il mainagestiun, er stads en contact cun la regenza grischuna, cun autres autoritads politicas, cun organizaziuns da turissem e cunzunt cun ustiers ed ustieras. Ultra da quai è er l'uniu grischuna, che reunescha ils 1000 ustiers ed ustieras, adina stada en contact cun Gastro Suisse, la federaziun tettala e naziunala dals gastronoms. Adina èn ustieras ed ustiers vegnids infurmads en quai che pertutga mesiras da Covid-19, soluziuns e cusegls. Caluori e Tischhauser èn era s'en-



Franz Sepp Caluori, il president da Gastro Grischun, è vegnì reelegi. FOTO GION NUTEGN STGIER.

gaschads per augmentar las indemnizaziuns per cas da direzza da 50% sin 75%.

Nagin na sa retira

Ils ustiers e las ustieras han approvà il rapport annual, sco er ils auters affars statutarics. Il quint annual serra tar entradas da 787 000 francs cun in gudogn da 7400 francs. En tavla èn er stadas elecziuns per la suprastanza da Gastro Grischun. Vinavant a la testa da quella federaziun stat Franz Sepp Caluori, l'ustier da Cuira. Dapi il 2016 è el el pli «aut» ustier dal Grischun, dasper esser deputà en il Cussegl grond. Confermadas èn er vegnidas las ulteriuras persunas che fan part a la suprastanza da l'uniun dals ustiers. Quai èn: Alexander Hösl, Domat, Analies Biäsch, Tavau, Fabia Caduff, Sursaissa, Primo Semadeni, Bever e Bruno Raselli, Le Prese.

1 million francs en furma da bons

Caluori è da buna speranza en vista a la stagiu da stad che stat avant porta. El

quinta tar la gastronomia e hotellaria cun sumegliantas reservaziuns sco la stad 2020. Gastro Grischun quinta a partir da la mesadad d'avust che l'ordinaziun da la distanza (maisas) e da la capacitat (quatter giasts per maisa) svaneschan. Caluori è da l'avis che lura saja puspè pussaivel d'avair in travagli normal e cumplet. La normalitat daventa puspè realitad. Franz Sepp Caluori e Marc Tischhauser, il mainagestiun da Gastro Grischun, han er fatg ina bilantscha dals davos tschintg onns. Ina culminaziun saja bain stà il catering a chasschun dal di da las portas avertas da la «EMS-Chemie» cun 13 000 persunas. In success saja lura er la campagna per giuvenils «Gastro Story» che mussia quant multifara che la gastronomia saja. L'aciun per carmalar daplis giasts en ils restaurants tiers corona saja in vair success, ha ditg Tischhauser. Fin ussa èn vegnids cumprads 1600 bons per ina summa dad 1 million francs.